

Հավելված N 1  
ՀՀ կառավարության 2011 թ.  
նոյեմբերի 17-ի նիստի N 45  
արձանագրային որոշման

Ռ Ա Ջ Մ Ա Վ Ա Ր ՈՒ Թ Յ ՈՒ Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍՆՆԴԱՄԹԵՐՔԻ ԱՆՎՏԱՆԳՈՒԹՅԱՆ  
ՀԱՄԱԿԱՐԳԻ ԶԱՐԳԱՑՄԱՆ

2011 թ., ԵՐԵՎԱՆ

## ԲՈՎԱՆԴԱԿՈՒԹՅՈՒՆ

- I. ՆԵՐԱԾՈՒԹՅՈՒՆ
- II. ԸՆԴՀԱՆՈՒՐ ԴՐՈՒՅԹՆԵՐ
- III. ՄԱԿՐՈՏՆՏԵՍԱԿԱՆ ԻՐԱՎԻՃԱԿԻ ԵՎ ՏՆՏԵՍՈՒԹՅԱՆ ԱԳՐԱՐԱՅԻՆ ՀԱՏՎԱԾԻ ԲՆՈՒԹԱԳԻՐԸ
- IV. ՍՆՆԴԱՄԹԵՐՔԻ ԱՆՎՏԱՆԳՈՒԹՅԱՆ ՀԱՄԱԿԱՐԳԻ ԲԱՐԵՓՈԽՈՒՄՆԵՐԸ
- V. ԵՎՐՈՊԱԿԱՆ ՄԻՈՒԹՅՈՒՆՈՒՄ ԵՎ ՆՐԱ ԱՆԴԱՄ-ՊԵՏՈՒԹՅՈՒՆՆԵՐՈՒՄ ՍՆՆԴԱՄԹԵՐՔԻ ԱՆՎՏԱՆԳՈՒԹՅԱՆ ԱՊԱՀՈՎՄԱՆ ՀԻՄՆԱԿԱՆ ՍԿԶԲՈՒՆՔՆԵՐԸ
- VI. ՌԱԶՄԱՎԱՐՈՒԹՅԱՆ ՀԻՄՆԱԿԱՆ ՆՊԱՏԱԿԸ ԵՎ ԽՆԴԻՐՆԵՐԸ
- VII. ՌԱԶՄԱՎԱՐՈՒԹՅԱՆ ՀԻՄՆԱԿԱՆ ՈՒՂՂՈՒԹՅՈՒՆՆԵՐԸ
- VIII. ՌԱԶՄԱՎԱՐՈՒԹՅԱՆ ԻՐԱԿԱՆԱՑՄԱՆ ՄԵԽԱՆԻԶՄՆԵՐԸ, ԱԿՆԿԱԼՎՈՂ ԱՐԴՅՈՒՆՔՆԵՐԸ ԵՎ ՄՈՆԻԹՈՐԻՆԳԸ

## I. ՆԵՐԱԾՈՒԹՅՈՒՆ

Սույն ռազմավարությամբ սահմանվում են Հայաստանի Հանրապետությունում սննդամթերքի անվտանգության համակարգի զարգացման հիմնական ուղղությունները՝ ելնելով միջազգային, մասնավորապես Եվրամիության անդամ պետությունների լավագույն փորձից:

Վերջին տարիներին սննդամթերքի անվտանգության բնագավառում սպառողների կյանքի և առողջության համար կատարվել են նաև իրավական համակարգի զարգացման դրական տեղաշարժեր: Մասնավորապես, ընդունվել են «Սննդամթերքի անվտանգության մասին», «Անասնակերի մասին» «Անասնաբուժության մասին», «Բուսասանիտարիայի մասին» նոր Հայաստանի Հանրապետության օրենքներ ու դրանց կիրարկումն ապահովող բազմաթիվ ենթաօրենսդրական նորմատիվ իրավական ակտեր: Հետևողականորեն բարելավվում է ինստիտուցիոնալ կառույցների գործունեությունը, քայլեր են արվում ռիսկերի գնահատման վրա հիմնված տեսչական գործունեության արդյունավետությունը բարձրացնելու ուղղությամբ: Տարեցտարի աճում է տնտեսավարող սուբյեկտների պատասխանատվությունն արտադրական գործընթացներում անվտանգ սննդամթերքի արտադրության համար տեխնոլոգիական պահանջների կատարման, ինչպես նաև խորանում և ընդլայնվում է հանրության մասնակցությունը սննդամթերքի անվտանգության նկատմամբ մոնիթորինգի իրականացման գործընթացներում:

*Հաշվի առնելով այն հանգամանքը, որ Հայաստանի Հանրապետությունում սննդամթերքի անվտանգության համակարգը դեռևս լիարժեք չի երաշխավորում սպառողների առողջության համար սննդային գործոնով պայմանավորված հիվանդությունների կանխարգելումը և այդ առումով առկա են մի շարք լուծում պահանջող հիմնահարցեր, ուստի անհրաժեշտություն է առաջանում մշակել և իրականացնել այդ բնագավառը կարգավորող համապատասխան միասնական քաղաքականություն:*

Սույն ռազմավարության իրականացումը նպատակաուղղված է նաև տեղական արտադրության սննդամթերքի մրցունակության բարձրացմանը՝ արտաքին և ներքին շուկաներում, որի իրագործմամբ նախադրյալներ կստեղծվեն Եվրամիության հետ խոր և համապարփակ ազատ առևտրի համաձայնագրի ստորագրման համար:

Աշխարհում ընթացող ներկա գլոբալիզացիայի անշրջելի գործընթացի համատեքստում սույն ռազմավարության տեսլականն է Հայաստանի Հանրապետությունում Եվրամիության պահանջներին համապատասխանող սննդամթերքի անվտանգության համակարգի ձևավորումը:

Սույն ռազմավարությունը բխում է Առևտրի Համաշխարհային Կազմակերպության՝ (ԱՀԿ) «Սանիտարական և բուսասանիտարական միջոցների կիրառման» մասին համաձայնագրի, Եվրամիություն-Հայաստան գործընկերության և համագործակցության համաձայնագրի՝ (ԳՀՀ), Եվրոպական հարևանության քաղաքականության շրջանակներում ընդունված գործողությունների ծրագրի, Եվրամիության Արևելյան գործընկերության քաղաքականության, ինչպես նաև Հայաստանի Հանրապետությունում ընդունված մի շարք ուղենիշային, ռազմավարական իրավական ակտերի պահանջներից:

Հաշվի առնելով, որ Եվրամիության պահանջներին համապատասխանող սննդամթերքի անվտանգության համակարգի ներդրումը բարդ, գիտական, ծախսատար, աշխատատար և ժամանակատար գործընթաց է, ուստի ակնկալվում է, որ այն *իրականացվելու է* բոլոր շահագրգիռ պետական և ոչ պետական կողմերի արդյունավետ համագործակցության, ինչպես նաև դոնոր-հանրության աջակցության շնորհիվ՝ ֆինանսավորման տարբեր աղբյուրներից պահանջվող դրամական միջոցների ներգրավմամբ:

## II. ԸՆԴՀԱՆՈՒՐ ԴՐՈՒՅԹՆԵՐ

1. Սպառողների առողջության համար սննդամթերքի անվտանգության, սանիտարական և բուսասանիտարական (այսուհետ՝ ՍԲՍ) բնագավառներում առաջընթացի ապահովումը Հայաստանի Հանրապետության տնտեսության ազրարային հատվածում իրականացվող քաղաքականության գերակայություններից է:

2. Սպառողների համար սննդամթերքի անվտանգությունը, վերջինիս ֆիզիկական և տնտեսական մատչելիության ապահովման հետ մեկտեղ, երկրի պարենային անվտանգության կարևորագույն բաղադրիչներից է և հանդիսանում է ազգային (տնտեսական) անվտանգության տարրերից մեկը: Այդ մոտեցումն ամրագրված է դեռևս 2002 թվականին ընդունված «Պարենային անվտանգության ապահովման մասին» Հայաստանի Հանրապետության օրենքով:

3. Մարդու օրգանիզմի ֆիզիկական և մտավոր զարգացումը, նյութափոխանակության բնականոն ընթացքը, իմունային, հորմոնային, ֆերմենտային և այլ համակարգերի նորմալ գործունեությունը, գենոֆոնդի պահպանումը հնարավոր են միայն լիարժեք, հաշվեկշռված սնուցման, ինչպես նաև սպառվող սննդատեսակների անվտանգության ապահովման պայմաններում:

4. Սննդամթերքի անվտանգության բնագավառը կարգավորվում է «Սննդամթերքի անվտանգության մասին», «Անասնաբուժության մասին», «Բուսասանիտարիայի մասին», «Անասնակերի մասին», «ՀՀ բնակչության սանիտարահամաճարակային անվտանգության ապահովման մասին», «Ստանդարտացման մասին», «Համապատասխանության գնահատման մասին», «Սպառողների իրավունքների պաշտպանության մասին», «Առևտրի և ծառայությունների մասին», «Հայաստանի Հանրապետությունում ստուգումների կազմակերպման և անցկացման մասին» Հայաստանի Հանրապետության օրենքներով, «Վարչական իրավախախտումների վերաբերյալ» Հայաստանի Հանրապետության օրենսգրքով, ինչպես նաև մի շարք այլ օրենքներով և շուրջ թվով 100 ենթաօրենսդրական իրավական ակտերով: Այնուամենայնիվ, սննդամթերքի անվտանգության բնագավառի ազգային օրենսդրությունը վերանայման և կատարելագործման կարիք ունի՝ այն աստիճանաբար համապատասխանեցնելով միջազգային, մասնավորապես Եվրամիության չափանիշներին:

5. «Սննդամթերքի անվտանգության մասին» Հայաստանի Հանրապետության օրենքում տրված են հատուկ նշանակության սննդամթերքի և սննդային արժեքի սահմանումները: ՀՀ օրենսդրությունը չի կարգավորում հատուկ նշանակության սննդամթերքի հաշվեկշռված սնուցման հարցերը, ինչպես նաև ամբողջությամբ չեն կանոնակարգվում դրանց վերահսկողության լիազորությունները: Այդ պատճառով տուժել է նաև նախադպրոցական կազմակերպություններում երեխաների սննդի լիարժեքության, սննդակարգի, ինչպես նաև անհրաժեշտ միկրոտարրերի քանակի ապահովման նկատմամբ վերահսկողությունը, ինչը խիստ կարևոր է երեխաների առողջ աճի և զարգացման համար:

6. Արտերկրից սննդամթերքի ներքին շուկա մուտք գործելու մատչելիության ապահովման՝ սակագնային կարգավորման տեսանկյունից Հայաստանի Հանրապետությունը դասվում է ամենաազատական՝ բաց շուկաներ ունեցող երկրների շարքին: ԱՀԿ-ին 6 տարի

անդամակցության գործընթացում Հայաստանի Հանրապետության սանիտարական և բուսասանիտարական համակարգը ընդհանուր առմամբ գնահատվել է դրական:

7. Եվրոպական հարևանության քաղաքականության (ԵՀՔ) շրջանակներում Հայաստանի Հանրապետությունն առաջնային գործընկեր երկրներից է: Եվրամիությունը և Հայաստանի Հանրապետության կառավարությունն ընդունել են 2009-2011 թվականների գործողությունների համատեղ ծրագիր, որը հիմնված է դեռևս 1996 թվականին ընդունված և 1999 թվականին վավերացված ԵՄ-Հայաստան Գործընկերության և համագործակցության համաձայնագրի (ԳՀՀ) դրույթների և 2006 թվականի նոյեմբերին վավերացված Եվրոպական հարևանության քաղաքականության (ԵՀՔ) գործողությունների ծրագրի վրա:

8. Սննդամթերքի անվտանգությունն ապահովվում է բուսական և կենդանական ծագման գյուղատնտեսական մթերքի և հումքի ապրանքային շարժի՝ սննդի շղթայի բոլոր փուլերում, ինչպես նաև շրջանառության միջանկյալ գործառնությունների (տեսակավորում, բեռնում, բեռնաթափում, փաթեթավորում, դրոշմավորում, առաքում և այլն) ընթացքում:



9. ՄԲՍ համակարգը Եվրամիության չափանիշներին համապատասխանացնելու ուղղությամբ ձեռնարկված գործնական նախաձեռնություններից է Հայաստանի Հանրապետության կառավարության 2005 թվականի մարտի 26-ի N 11 արձանագրային որոշմամբ ընդունված «Հայաստանի Հանրապետության և Եվրոպական Համայնքի ու դրա անդամ-պետությունների միջև կնքված Գործընկերության և համագործակցության համաձայնագրի իրականացման» Ազգային ծրագիրը: Նշված ծրագիրը ներառել է ՄԲՍ բնագավառի օրենսդրության կատարելագործման, ինստիտուցիոնալ կառույցների ամրապնդման, խորհրդատվության տրամադրման և կադրերի ուսուցման միջոցառումները՝ 2005-2008 թվականների կտրվածքով:

### III. ՄԱԿՐՈՏՆՏԵՍԱԿԱՆ ԻՐԱՎԻՃԱԿԻ ԵՎ ՏՆՏԵՍՈՒԹՅԱՆ ԱԳՐԱՐԱՅԻՆ ՀԱՏՎԱԾԻ ԲՆՈՒԹԱԳԻՐԸ

10. Երկրի պարենային անվտանգության՝ մասնավորապես սննդամթերքի անվտանգության մակարդակի բարձրացման տեսանկյունից առանձնակի կարևորվում է երկրի մակրոտնտեսական վիճակի կայունությունը և տնտեսության ագրարային հատվածում հետագա առաջընթացի ապահովումը:

11. Վերջին տարիներին Հայաստանի Հանրապետության տնտեսությունում, ընդհանուր առմամբ, դրսևորվել են աճի և զարգացման միտումներ: 1995-2008 թվականներին տնտեսական տարեկան միջին աճը կազմել է 9 տոկոս, ընդ որում 2001-2007 թվականներին տարեկան միջին աճը կազմել է 12.6 տոկոս: Նույն ժամանակահատվածում զգալի տեմպերով ավելացել է նաև 1 շնչին ընկնող համախառն ներքին արդյունքը (այսուհետ՝ ՀՆԱ), որը 2001 թվականին կազմել է 659.1 ԱՄՆ դոլար, իսկ 2008-ին՝ 3605.8 ԱՄՆ դոլար: Սակայն իրավիճակը փոխվեց 2009 թվականին համաշխարհային տնտեսական ճգնաժամի հետևանքով: Ի տարբերություն նախորդ տարիների երկնիշ աճի, 2008 թվականին Հայաստանի Հանրապետության տնտեսական աճը կազմեց 6.9 տոկոս, 2009 թվականին անկումը կազմեց 14.2 տոկոս, իսկ 2010 թվականի արդյունքներով աճը կազմեց ընդամենը 2.6 տոկոս:

12. Արտաքին առևտրի ընդհանուր ծավալները Հայաստանի Հանրապետությունում 2010 թվականին կազմել են ՀՆԱ-ի 51.0 տոկոսը (4.8 մլրդ ԱՄՆ դոլար): 2010 թվականին ապրանքաշրջանառության շուրջ 21 տոկոսը բաժին է ընկել արտահանման գործարքներին, իսկ մնացածը՝ ներմուծմանը:



13. 2010 թվականի ընթացքում իրականացված բյուջետային քաղաքականության մոտեցումը եղել է բազմակողմ և միաժամանակ հավասարակշռված. մի կողմից նպատակ է դրվել չհակազդել տնտեսական վերականգնմանը, մյուս կողմից՝ մեղմել գնաճային ռիսկերը՝ զուգահեռաբար ապահովելով արդյունավետ պարտքի կառավարում և պակասորդի աստիճանական կրճատում:

Հայաստանի Հանրապետության հիմնական մակրոտնտեսական ցուցանիշները արտահայտված են աղյուսակում (տես Աղյուսակ 1, 2008-2010 թվականները փաստացի, 2011 թվականը՝ կանխատեսում):

ՀՀ հիմնական մակրոտնտեսական ցուցանիշները

	2008թ.	2009թ.	2010թ.	2011թ.
	վիաստացի			բյուջետային ծրագիր
Անվանական ՀՆԱ, մլրդ դրամ	3568.2	3102.8	3509.6	3763.5
ՀՆԱ-ի իրական աճ, %	6.9	-14.2	2.6	4.6
Անվանական ՀՆԱ, մլն ԱՄՆ դոլար	11662	8541.1	9392.6	10513.2
ՀՆԱ-ի դեֆլատոր, %	5.9	1.3	10.2	3.6
Սղաճ (Ժ-շրջ-ի վերջ), %	5.2	6.5	9.4	4.0
Սղաճ (միջին), %	9.0	3.4	8.2	-
Փոխարժեք (ՀՀ դրամ/ԱՄՆ դոլար, միջին)	306.0	363.3	373.7	357.98
Պետական բյուջեի ընդամենը եկամուտներ, մլրդ դրամ	785.4	689.9	779.5	852.4
Պետական բյուջեի ընդամենը եկամուտներ/ՀՆԱ, %	22.0	22.2	22.2	22.6
Պետական բյուջեի ընդամենը հարկային եկամուտներ/ՀՆԱ, %	17.4	16.8	16.9	17.3
Պետական բյուջեի ընդամենը ծախսեր, մլրդ դրամ	810.6	929.1	954.3	1001
Պետական բյուջեի ընդամենը ծախսեր/ՀՆԱ, %	22.7	29.9	27.2	26.6
Պետական բյուջեի դեֆիցիտ/ՀՆԱ, %	0.7	7.7	5.0	3.9
Ապրանքային հաշվեկշիռ*, մլն ԱՄՆ դոլար	-2664.0	-2081.1	-2144.5	-2275.0
Ապրանքների ներմուծում*, մլն ԱՄՆ դոլար	3776.0	2830.0	3210.9	3414.0
Ապրանքների և ծառայությունների ներմուծում/ՀՆԱ*, %	-40.7	-43.2	-44.3	-47.6
Ապրանքների արտահանում*, մլն ԱՄՆ դոլար	1112.0	748.9	1066.4	1139.0
Ապրանքների և ծառայությունների արտահանում/ՀՆԱ*, %	15.1	15.7	18.7	20.4
Ընթացիկ հաշիվ/ՀՆԱ (ներառյալ պաշտոնական տրանսֆերտները)*, %	11.8	-16.0	-13.9	-13.1

\* 2010թ. վճարային հաշվեկշռի տվյալները ՀՀ Ֆինանսների նախարարության գնահատականներն են:

14. Ագրոպարենային համակարգը Հայաստանի Հանրապետության տնտեսության կարևորագույն ոլորտներից մեկն է, որը վերջին հինգ տարիների տվյալներով ապահովել է երկրի համախառն ներքին արդյունքի 21.7 տոկոսը, այդ թվում գյուղատնտեսությունը՝ 17.4 տոկոսը: Հայաստանի Հանրապետության կառավարության 2008-2012 թվականների գործունեության ծրագրով գյուղատնտեսության ոլորտը դասվում է պետական ծախսային քաղաքականության գերակայությունների շարքին:

15. Ներկայումս ագրոպարենային ոլորտում ձևավորվել է շուկայական հարաբերություններով կարգավորվող ազատ տնտեսական համակարգ, որը ներառում է բազմաազար գյուղացիական տնտեսություններ, գյուղատնտեսությամբ զբաղվող առևտրային



կազմակերպություններ, գյուղատնտեսության սպասարկման, գյուղմթերքի իրացման ու վերամշակման մասնավոր ընկերություններ:

16. Գյուղատնտեսության համախառն արտադրանքի ավելի քան 98 տոկոսը արտադրվում է մասնավոր հատվածի կողմից, ընդ որում 2010 թվականի տվյալներով համախառն արտադրանքի ավելի քան 61.6 տոկոսը բաժին է ընկել բուսաբուծությանը, իսկ շուրջ 38.4 տոկոսը՝ անասնաբուծությանը:

17. Հայաստանի Հանրապետության ագրոպարենային համակարգի զարգացման իրատեսական գնահատմամբ գյուղատնտեսության ոլորտում առկա է ինտենսիվ և էքստենսիվ զարգացման զգալի չօգտագործված ներուժ: Ներկայումս տեղական արտադրության հաշվին, էներգետիկ արժեքով հաշվարկված, բավարարվում է կենսապես կարևորագույն սննդամթերքի նկատմամբ պահանջարկի շուրջ 60 տոկոսը (2009թ. տվյալներ): Սակայն երկրի բնատնտեսական ներուժը մոտակա ժամանակահատվածում հնարավորություն է ընձեռում ավելացնել ինքնաբավության մակարդակը ևս 15-20 տոկոսով:

18. Հայաստանի Հանրապետության կառավարության 2010 թվականի նոյեմբերի 4-ին ընդունվել է «Հայաստանի Հանրապետության գյուղի և գյուղատնտեսության 2010-2020 թվականների կայուն զարգացման ռազմավարությունը և Հայաստանի Հանրապետության գյուղի և գյուղատնտեսության 2010-2020 թվականների կայուն զարգացման ռազմավարության կատարումն ապահովող միջոցառումների ցանկը հաստատելու մասին» N 1476-Ն որոշումը: Նշված ռազմավարության իրականացումից ակնկալվում են հատկապես հետևյալ հիմնական արդյունքները՝

1) 2020 թվականին գյուղատնտեսական արտադրության ծավալը 2007-2009 թվականների միջին մակարդակը կգերազանցի շուրջ 46 տոկոսով.

2) գյուղատնտեսության մեջ զբաղվածների թվաքանակը կդրսևորի կրճատման միտում (2020 թվականին կկազմի 420 հազ. զբաղված, ներկայիս 493.0 հազ. զբաղվածի դիմաց) և համախառն արտադրանքի ավելացումը կապահովվի աշխատանքի արտադրողականության ավելացման հաշվին.

3) գյուղատնտեսության ապրանքայնության մակարդակը 2020 թվականին կհասնի մինչև 75 տոկոս, որը հնարավորություն կտա էականորեն ավելացնել գյուղացիական տնտեսությունների դրամական հոսքերը և վերարտադրողական կարողությունները.

4) 2020 թվականին ցանքային տարածքը կհասցվի 421.0 հազ. հա, որը կգերազանցի 2007-2009 թվականների մակարդակը շուրջ 39.0 տոկոսով: Նույն ժամանակահատվածում կերային մշակաբույսերի տարածությունը կհասցվի 155.0 հազ., իսկ բազմամյա տնկարկներինը՝ 86.2 հազ. հա: Այսինքն՝ 2007-2009 թվականների մակարդակը կգերազանցվի համապատասխանաբար 2.4 և 1.6 անգամ.

5) դրական տեղաշարժեր կլինեն բուսաբուծության և անասնապահության ներճյուղային կառուցվածքում՝ կավելանա պտղի, խաղողի, կարտոֆիլի, բանջարեղենի, կերային և տեխնիկական մշակաբույսերի համախառն արտադրությունը: Անասնապահության մեջ նկատելիորեն կավելանա ոչխարաբուծությունից և թռչնաբուծությունից ստացվող մթերքների տեսակարար կշիռը.

6) բարձր բերքատու սորտերի շրջանացման և մշակության տեխնոլոգիաների արդիականացման շնորհիվ կանխատեսվող ժամանակահատվածի վերջում՝ 2007-2009 թվականների համեմատությամբ հացահատիկային մշակաբույսերի, կարտոֆիլի, բանջարեղենի բերքատվությունը կաճի համապատասխանաբար՝ 44.6; 34.8 և 34.2 տոկոսով, իսկ պտղի և խաղողի բերքատվությունը՝ 36.7 և 12.5 տոկոսով.

7) տոհմային գործի զարգացման, կերակրման և պահվածքի բարելավման շնորհիվ 2020 թվականին կովի կաթնատվության միջին մակարդակը կհասցվի տարեկան 2480 կիլոգրամի.

8) պարենի և գյուղատնտեսական հումքի արտահանման ծավալները կավելանան 3.5 անգամ.

9) կբարձրանա հանրապետության բնակչության պարենային անվտանգության մակարդակը, զգալիորեն կավելանա կարևորագույն պարենամթերքների տեղական արտադրության հաշվին ապահովվածությունը, կավելանան գյուղատնտեսությունում տնտեսավարողների եկամուտները:

Վերը նշված ռազմավարությամբ սահմանված են նաև վերջինիս իրականացման (կառավարման) մեխանիզմները և մոնիթորինգի ցուցանիշները՝ արտադրություն-վերամշակում-իրացում սննդամթերքի ապրանքային շարժի շղթայում:

19. Կարտոֆիլի, պտղի, բանջարեղենի, խաղողի, թռչնի ձվի նկատմամբ բնակչության պահանջարկը ամբողջությամբ բավարարվում է տեղական արտադրության հաշվին, սակայն ցորենի, շաքարի, բուսական յուղի, տավարի և հավի մսի պահանջարկը հիմնականում

բավարարվում է ներմուծման հաշվին: Որակական և համային բարձր ցուցանիշների շնորհիվ ինչպես թարմ, այնպես էլ վերամշակված տեսքով հայրենական սննդամթերքը մրցունակ է արտաքին շուկաներում:

20. Հայաստանի Հանրապետությունում ներկայումս գործում են խաղող վերամշակող շուրջ 50, պտուղբանջարեղեն վերամշակող ավելի քան 30, կաթ վերամշակող 284 /ներառյալ կաթի ընդունման կետերը/, միս վերամշակող 80, ալրաղաց շուրջ 60, ինչպես նաև ավելի քան 750 հացաբուլկեղեն արտադրող ընկերություններ:

21. Հայաստանի Հանրապետության գյուղատնտեսությունը հետայսու *շարունակելու է մասնագիտացումը թարմ մրգի, խաղողի, հացահատիկի, կարտոֆիլի ու դրանց վերամշակումից ստացվող բազմաթիվ արտադրատեսակների, ինչպես նաև մսամթերքի և կաթնամթերքի լայն տեսականու արտադրության ուղղությամբ: Ընդ որում, նախորդ տարում կազմակերպվել է շաքարի (շաքարավազի) տեղական արտադրություն, որը ապահովելու է այդ կարևորագույն սննդամթերքի պահանջարկի ամբողջական բավարարումը՝ ներքին շուկայում, ինչպես նաև հնարավորություն է ընձեռելու արտերկիր արտահանել տարեկան շուրջ 100-120 հազար տոննա արտադրանք:*

22. Ըստ հաշվարկների, ներմուծվող կենսապես կարևորագույն սննդամթերքի մաքսատուրքի միջին դրույքաչափը կազմում է շուրջ 5 տոկոս, ինչը բխում է սպառողների շահերից, սակայն չի ապահովում ներքին շուկայի բավարար չափով պաշտպանությունը (Հայաստանի Հանրապետությունում փաստացի կիրառվում է միայն 0-ական կամ 10 տոկոսանոց մաքսային դրույքաչափ): Միջպետական առևտրի ազատականացումը, փաստացի երաշխավորում է սննդամթերքի ֆիզիկական մատչելիությունը, բացառությամբ արտակարգ իրավիճակներում մատակարարումների խաթարման դեպքերի:

23. Արտաքին առևտրի ապրանքային կառուցվածքում գյուղատնտեսական ծագման արտադրանքի արտահանման տեսակարար կշիռը 2009 թվականին կազմել է 19.0, իսկ 2010 թվականին՝ 16.9 տոկոս: Ներմուծման տեսակարար կշիռը նույն տարեթվերին կազմել է համապատասխանաբար՝ 18.4 և 17.9 տոկոս: Արտահանման գյուղատնտեսական ծագման արտադրանքի կեսից ավելին՝ 60 տոկոսը, բաժին է ընկնում կոնյակին, հետևաբար՝ առաջանում է արտահանման դիվերսիֆիկացման խնդիր: Գյուղատնտեսական ապրանքների արտահանման ծավալների ավելացումը, առևտրային հաշվեկշռի և կառուցվածքի բարելավումը դասվում են ռազմավարական հիմնախնդիրների շարքին:

24. Վերջին տարիների ընթացքում Հայաստանի Հանրապետության կառավարության վարած արդյունավետ մակրոտնտեսական և ներդրումային քաղաքականության արդյունքում օտարերկրյա ներդրողների կողմից իրական հատվածում իրականացված ներդրումների՝ առանց պետական կառավարման և բանկային համակարգով ստացված վարկերի, շարժընթացը (դինամիկան) արտահայտված է աղյուսակում (տես Աղյուսակ 2):

Աղյուսակ 2.

Հայաստանի Հանրապետության իրական հատվածում օտարերկրյա ներդրողների (առանց պետական կառավարման և բանկային համակարգով ստացված վարկերի) հոսքերի շարժընթացը 2000-2010 թվականներին

(մլն ԱՄՆ դոլար)

	2000թ.	2001թ.	2002թ.	2003թ.	2004թ.	2005թ.	2006թ.	2007թ.	2008թ.	2009թ.	2009թ. Հունվար սեպտեմբեր	2010թ. Հունվար, սեպտեմբեր
Ընդհանուր ներդրումներ	190.1	122.5	217.5	229.6	305.6	431.2	601.0	845.4	1257.6	935.5	522.0	472.2
Ուղղակի ներդրումներ	120.1	75.9	141.0	153.5	226.7	275.3	407.6	582.3	1001.0	732.1	384.3	348.7

25. Ներդրումային բարենպաստ միջավայրի ձևավորման հիմնական նպատակը ներդրումների ներգրավման միջոցով երկրի սոցիալ-տնտեսական իրավիճակի բարելավումն է: Այդ նպատակին հասնելու համար քաղաքականությունը նպատակաուղղվելու է՝

1) գործարար նախաձեռնությունների խրախուսմանը և գործարարությամբ զբաղվելու համար բարենպաստ մրցակցային միջավայրի ձևավորմանը.

2) ներդրումների, այդ թվում օտարերկրյա ուղղակի ներդրումների, գրավչության խթանմանը.

3) Հայաստանի Հանրապետության տարածաշրջանների տնտեսական ներգրավման բարձրացմանը և համաչափ զարգացմանը.

4) ընկերությունների գրանցման և լուծարման գործընթացների պարզեցմանը.

5) հարկային և մաքսային վարչարարության թափանցիկության և անկողմնակալության ապահովմանը, ռիսկերի գնահատման համակարգերի ձևավորմանը, հաշվետվողականության պարզեցմանն ու կրճատմանը և զեկուցման էլեկտրոնային համակարգի ներդրմանը.

6) պահանջների պարզեցմանը, շինարարության թույլտվությունների քանակի նվազեցմանը.

7) աշխատանքային հարաբերությունները կարգավորող օրենսդրության բարելավմանը.

8) բաժնետերերի շահերի պաշտպանության բարձրացմանն ուղղված միջոցառումների իրականացմանը, մասնավորապես՝ կորպորատիվ կառավարման մշակույթի ձևավորմանը.

9) դատական համակարգի բարելավմանը, իրավական պրակտիկաների կիրառման համար պահանջվող ժամանակի նվազեցմանը.

10) վարկային միջոցների հասանելիության ապահովմանը և անշարժ գույքի գրանցման էլեկտրոնային համակարգի ներդրմանը.

11) վարչարարության բեռի նվազեցմանը (օպտիմալացմանը):

26. Իրականացվող տնտեսական քաղաքականության շնորհիվ փոքր և միջին ձեռնարկատիրությունը (այսուհետ՝ ՓՄՁ) հանդիսանում է երկրի դինամիկ զարգացող ոլորտներից մեկը: Նշվածի հետ մեկտեղ Հայաստանի Հանրապետության գյուղատնտեսական արտադրությունում գործում են հետսեփականաշնորհման ժամանակահատվածում ձևավորված շուրջ 340.0 հազար գյուղացիական ֆերմերային տնտեսություններ, որոնցից յուրաքանչյուրին բաժին է ընկնում ընդամենը 1.4 հա գյուղատնտեսական հողատեսքեր, այդ թվում՝ 1.1 հա վարելահողեր, ինչը սահմանափակում է գյուղատնտեսությունում տնտեսավարողների վերարտադրողական կարողությունները: Բացի այդ, յուրաքանչյուր տնտեսությանը բաժին է ընկնում շուրջ 4 մասնատված հողակտոր, իսկ գյուղատնտեսական արտադրությունը փաստացի իրականացվում է ավելի քան 1200,0 հազար հողակտորի վրա: Ելնելով գյուղատնտեսական արտադրության վերը նշված պայմաններից ու առանձնահատկություններից՝ ՍԲՍ բնագավառը կարգավորող օրենսդրության կատարելագործումը և ինստիտուցիոնալ բարեփոխումներն իրականացվելու են տարբերակված՝ հաշվի առնելով ՓՄՁ ոլորտի վրա (այդ թվում՝ գյուղացիական տնտեսությունների) ազդեցության գնահատման արդյունքները, բարեփոխումների բացասական ներգործությունը հնարավորինս բացառելու (մեղմելու) նպատակով: Ազդեցության գնահատականն իրականացվելու է՝ ելնելով Եվրամիության լավագույն փորձից:

27. Ընտրվել են Եվրամիություն հեռանկարային արտահանման մի քանի ոլորտներ՝ հիմնված ոլորտային վերլուծության և սննդի շղթայի մասնակիցների հետ սերտ համագործակցության վրա: Դրանք վայրի ձուկ և ձկնամթերք, մեղր, թարմ և վերամշակված միրգ, մասնավորապես հատապտուղ, բանջարեղեն, հյութեր, կոնյակ և օրգանական

գյուղատնտեսության արտադրանքի որոշ տեսակներ: Եվրամիության օրենսդրության հիմնական սկզբունքներին և դրույթներին մոտարկումը հնարավորություն է տալու առաջնային համարվող սննդամթերքի տեղական արտադրողներին մուտք գործելու եվրոպական շուկաներ, ինչն էլ իր հերթին *խթանելու է* սննդի արտահանումից ստացվող եկամուտների աճը: Այս ապրանքատեսակներին վերաբերող ուղղահայաց օրենսդրության մոտարկումը առաջնային է:

28. Հայաստանի Հանրապետությունում վայրի ձկան և ձկնամթերքի արտադրության ներուժը ներկայումս լիովին չի շահագործվում: Արդյունահանվում են խեցգետինը, ծիածանափայլ, շագանակագույն իշխանը և թառափ: Խեցգետինը որսում են Սևանա լճից, մյուս ձկնատեսակները աճեցվում են արհեստականորեն:

Ձկնամթերքի տարեկան արտադրությունը 2008 թվականին կազմել է 5701.1 տոննա, որն ամբողջությամբ իրացվել է: 2009թ.-ին այդ ցուցանիշը կազմել է 5616.9 տոննա, իսկ 2010-ին՝ 5215.70 տոննա, որը նույնպես իրացվել է ամբողջությամբ: Արտադրության ծավալների նվազումը պայմանավորված է առկա սահմանափակված շուկայով, քանի որ Հայաստանի Հանրապետության տնտեսական շուկան ներկայումս բավականին փոքր է, և արտադրանքը հիմնականում արտահանվում է Ռուսաստան: Երբ արտադրողները կարողանան համապատասխանեցնել իրենց արտադրանքը սննդամթերքի անվտանգության ստանդարտներին, այդ ժամանակ նրանք կարող են զարգացնել արտահանման ներուժը արդյունավետ կերպով: Հաշվարկված է, որ 3 տարիների ընթացքում ձկնամթերքի արտադրության ծավալը կարող է աճել 4-5 անգամ՝ հասնելով տարեկան 20-25 հազ. տոննայի, որի 50 տոկոսը կարող է արտահանվել եվրոպական շուկա:

Ըստ Հայաստանի Հանրապետության ազգային վիճակագրական տվյալների՝ ընդհանուր արտահանված կենդանիների և կենդանական ծագման արտադրանքից ձկան, խեցգետնի և ձկնաբուծության այլ տեսակների արտահանումը 2008-2010 թվականներին 36,9 տոկոսից աճել է մինչև 53 տոկոս: 2008-2010 թվականներին արտահանված այս արտադրանքի արժեքը կազմել է միջինը 5307.8 հազար ԱՄՆ դոլար: Հայաստանի Հանրապետությունում առկա 250 ձկնաարդյունաբերական ձեռնարկությունների 85-90 տոկոսը փոքր և միջին են, որոնք կարող են էական օգուտ ունենալ արտաքին, հատկապես եվրոպական շուկաներ մուտք գործելուց:

Սպասելի են բազմաթիվ փոփոխություններ և խնդիրներ՝ այն է սեփական անվտանգության և հիգիենայի պայմանների համակարգի ներդրում արտադրողների կողմից, մնացորդների մոնիթորինգի և կենդանիների առողջության վերահսկման համակարգի ներդրում ձկնաբուծարաններում՝ համաձայն պետական ռազմավարության և այլն, որոնց լուծումը ձկնարդյունաբերությունը մոտարկման Եվրոմիության ստանդարտների համակարգի արդյունքում պետք է իրականացնի, իսկ առաջարկված փոփոխությունների արդյունքը կլինի անվտանգ և մաքուր սննդի առկայությունը:

29. Մեղվաբուծությամբ զբաղվում են Հայաստանի Հանրապետության ողջ տարածքում: Մեղրը օգտագործվում է որպես սնունդ, ինչպես նաև լայն կիրառում է գտել ավանդական բժշկության մեջ՝ հիմնվելով բժշկական փորձարկումների վրա: Մեղվաբուծությունից ստացվում է նաև այլ արժեքավոր արտադրանքներ, ինչպես օրինակ՝ մեղվամոմ, պրոպոլիս, դեղամիջոցներ և մեղվի թույն:

Հայաստանի Հանրապետությունում մեղվաբուծության ներկա իրավիճակի ուսումնասիրությունը՝ մեղվաընտանիքների և մեղվաբուծությամբ զբաղվող տնտեսությունների քանակը, ինչպես նաև արտադրանքի տարեկան ծավալը և իրացված մեղրի ցուցանիշները բացահայտեցին Հայաստանի Հանրապետությունում մեղվաբուծության զարգացման և արտահանման հնարավորությունները: Մասնավորապես, ըստ մեղվաբուծների ասոցիացիայի տվյալների, մեղվաընտանիքների թիվը 2009 թվականին հասել է 1000-ի, այն դեպքում, երբ 2003 թվականին այն 171 էր:

2008-2010 թվականներին գյուղացիական տնտեսությունների կողմից արտադրված մեղրի միջին քաշի 42,9 տոկոսը վաճառվել է, իսկ մնացածը տրվել է ապրանքափոխանակման կամ մատուցված ծառայությունների դիմաց, օգտագործվել կամ մնացել է տնտեսությունում (տես Աղյուսակ 3):

*Աղյուսակ 3.*

*Մեղրի իրացումը գյուղացիական տնտեսությունների կողմից 2008-2010թթ. (արտադրության ծավալի նկատմամբ, %)*

Տարեթիվը	Վաճառվել է %	տրվել է ապրանքափոխանակման դիմաց, %	տրվել է բնամթերքով մատուցված ծառայությունների դիմաց, %	օգտագործվել է տնտեսությունում, %	մնացորդը տնտեսությունում, %
2008	40.6	9.3	1.0	26.1	23.0
2009	43.2	7.9	0.6	43.9	4.4
2010	44.9	4.6	0.7	31.6	18.2

Այսօր Հայաստանի Հանրապետությունում կան մոտ 5000 մեղվաբույծներ՝ 201580 մեղվաընտանիքներով: Մեղվաբուծական տնտեսությունների մեծամասնությունը փոքր և միջին չափի են, ունեն միջինը 30-50 փեթակ՝ յուրաքանչյուրը միջինը 8 կգ մեղր արտադրողականությամբ:

Զգալի ավելացել է մեղրի արտահանումը. եթե 2009 թվականին այն կազմում էր 3648,6 կգ, ապա 2010-ին՝ 12403,8 կգ: *Մեղրի արտադրության ծավալների մեծացման և տնտեսություններում մեղրի մնացորդի նվազեցման նպատակով իրականացված մեղվաբուծական տնտեսությունների հնարավորությունների գնահատմամբ հաստատվել է, որ մեղվաբուծական տնտեսությունները պատրաստակամ են և ունեն հնարավորություններ մեղրի արտադրությունը 3-4 անգամ ավելացնելու:*

Այդ պատճառով անհրաժեշտ է մեղրի արտադրության ոլորտի ՀՀ օրենսդրությունը և ստանդարտները մոտարկել ԵՄ օրենսդրությանը, ընդունել անհրաժեշտ իրավական ակտեր ու ստանդարտներ և սահմանել համապատասխան ընթացակարգեր, որպեսզի հնարավոր լինի մեղրի և մեղվաբուծական արտադրանքի արտահանումը ԵՄ անդամ երկրներ:

30. Այգեգործությունն ու բանջարաբուծությունը համարվում են հայկական գյուղատնտեսության առաջնային ենթաճյուղերից: Ժամանակակից մշակման և փաթեթավորման տեխնոլոգիաների շնորհիվ հայկական մրգերի, մասնավորապես՝ ծիրանի, դեղձի, բալի, կեռասի, հատապտուղների ու բանջարեղենի համար ստեղծվում է հնարավորություն՝ հաջողությամբ մուտք գործելու միջազգային շուկա: Այս ոլորտը արտահանման միտում ունի. 2008-2010 թվականներին իրացվել է արտադրված մրգի և հատապտուղների միջին քաշի 41.3% տոկոսը (տես Աղյուսակ 4), իսկ բանջարանոցային մշակաբույսերի համար այդ ցուցանիշը կազմել է 67,8 տոկոս: 2009 թվականին արտահանվել է 1,9895.4 հազար ԱՄՆ դոլարի բուսական ծագման արտադրանք, ինչը կազմել է բուսաբուծության համախառն արտադրանքի 2.1 տոկոսը, իսկ 2010 թվականին բուսական ծագման արտադրանքի արտահանումը կազմել է բուսաբուծության ոլորտի համախառն արտադրանքի 1.5 տոկոսը (1,5845.0 ԱՄՆ դոլար), ինչը պայմանավորված էր բնակլիմայական անբարենպաստ պայմանների հետևանքով՝ ցածր բերքատվությամբ: 3-4 տարվա ընթացքում բուսական ծագման արտադրանքի, մասնավորապես՝ մրգի, հատապտուղների ու բանջարեղենի արտահանման ծավալները կարող են ավելանալ 3 անգամ և կազմել բուսաբուծության համախառն արտադրանքի 10-15 տոկոսը:



Միրգ ու բանջարեղեն արտադրող ֆերմերներն ու վերամշակող ընկերությունները անշուշտ կարող են օգուտ քաղել սննդամթերքի անվտանգության ստանդարտների կիրառման և համապատասխան ազգային օրենսդրության բարելավման ու դրանց՝ Եվրամիության պահանջներին համապատասխանեցման դեպքում: Բացի այդ, չրերի արտադրությունը համարվում է հայկական գյուղատնտեսության հեռանկարային ճյուղերից մեկը: Այն հիմնված է տեղական ավանդույթների վրա և իրականացվում է Հայաստանի Հանրապետության գրեթե բոլոր մարզերում: Հայաստանի Հանրապետությունում ներկայումս գործում են մրգի ու բանջարեղենի վերամշակման ավելի քան 30 ձեռնարկություններ: Նրանք բոլորն էլ ունեն արտադրության և վերամշակման ծավալները մեծացնելու բավականին մեծ ներուժ՝ Եվրամիության շուկա մուտք գործելու հնարավորության դեպքում: Հայաստանի Հանրապետությունը կարող է օգուտներ ստանալ նաև Եվրոպայում օրգանական գյուղատնտեսության արտադրանքի աճող պահանջարկից, ընդ որում, այդ ոլորտում վերջին տարիներին երկրում զգալի աճ է գրանցվել:

*Աղյուսակ 4.*

Պտղի և հատապտղի իրացումը գյուղացիական տնտեսությունների կողմից 2008-2010թթ.

*(արտադրության ծավալի նկատմամբ, %)*

Տարեթիվը	Վաճառվել է %	տրվել է ապրանքափոխանակման դիմաց, %	տրվել է բնամթերքով մատուցված ծառայությունների դիմաց, %	օգտագործվել է տնտեսությունում, %	մնացորդը տնտեսությունում, %
2008	46.2	5.1	1.8	19.5	27.4
2009	50.8	6.4	0.8	20.3	21.7
2010	26.9	6.9	1.2	36.0	29.0

31. Հետևաբար, Եվրամիության օրենսդրության հիմնական սկզբունքներին և դրույթներին մոտարկումը հնարավորություն է *տալու* տեղական արտադրողներին ունենալու անվտանգ և մաքուր սննդի արտադրություն, այսպիսով հնարավորություն ընձեռնելով նրանց մուտք գործել Եվրոպական շուկաներ, ինչն էլ իր հերթին *խթանելու է* առաջնային համարվող արտադրանքների, ինչպես նաև մոտարկման արդյունքում գյուղատնտեսական արտադրանքի այլ տեսակների արտահանումից ստացվող եկամուտների աճը:

#### IV. ՄՆՆԴԱՄԹԵՐՔԻ ԱՆՎՏԱՆԳՈՒԹՅԱՆ ՀԱՄԱԿԱՐԳԻ ԲԱՐԵՓՈԽՈՒՄՆԵՐԸ

32. Մննդամթերքի անվտանգության համակարգի բարեփոխումներն ընթանում են 2009 թվականի փետրվարի 16-19-ը Եվրոպական հանձնաժողովի փաստահավաք առաքելության ուսումնասիրությունների արդյունքներով բացահայտված բացթողումների աստիճանական վերացման ուղղությամբ: Նշված ուսումնասիրությունները հիմք են հանդիսացել նաև Եվրոպական խորհրդատվական խմբի աջակցությամբ սույն ռազմավարության մշակման համար:

33. Հայաստանի Հանրապետությունը 2003 թվականի փետրվարից անդամակցում է ԱՀԿ-ին և միացել է ԱՀԿ-ի համաձայնագրերին, մասնավորապես՝ «Սանիտարական և բուսասանիտարական միջոցների կիրառման մասին», «Մտավոր սեփականության պաշտպանության մասին», «Առևտրի տեխնիկական խոչընդոտների մասին», «Գյուղատնտեսության մասին» համաձայնագրերին և, ընդհանուր առմամբ, համապատասխանեցրել է ազգային օրենսդրությունը նշված համաձայնագրերի պահանջներին:

34. Ներկայումս սննդամթերքի անվտանգության բնագավառում գործում են ազգային (ՀՍ), միջազգային (ԻՍՕ), Եվրոպական (EN), միջպետական (ԳՈՍ) ստանդարտներ, որոնք սահմանում են բուսական և կենդանական ծագման սննդամթերքի արտադրության, պահման, փաթեթավորման, փոխադրման, մակնշման և ապրանքային շղթայի այլ փուլերում որակի և անվտանգության պահանջները, փորձարկման մեթոդները, ինչպես նաև այդ գործընթացներում սպառողներին մոլորության մեջ գցող գործոնների վերացման (ռիսկերի նվազեցման) համար անհրաժեշտ չափորոշիչները

35. ՄԲՍ բնագավառում իրականացվող գործնական բարեփոխումներից առանձնակի կարևորվում է Հայաստանի Հանրապետության գյուղատնտեսության նախարարության կառավարման ոլորտում գործող սննդամթերքի անվտանգության պետական ծառայության ստեղծումը: Նշված ծառայության կարգավիճակի և կարևորության մասին վկայում է թերևս այն փաստը, որ ծառայության պետին և պետի տեղակալներին պաշտոնի նշանակում և ազատում է Հայաստանի Հանրապետության վարչապետը, իսկ ծառայության տարեկան հաշվետվությունները քննարկվում են Հայաստանի Հանրապետության կառավարությունում:

Սննդամթերքի անվտանգության պետական ծառայության պետի և պետի տեղակալների ընտրությունը կատարվել է մրցույթային եղանակով, այդ նպատակով

ձևավորված միջգերատեսչական մրցույթային հանձնաժողովի կողմից, որի կազմում ներգրավված է եղել նաև Հայաստանի Հանրապետությունում Եվրամիության Խորհրդատվական Խմբի ղեկավարը:

Սննդամթերքի անվտանգության պետական ծառայության ստեղծմամբ հնարավորություն ընձեռվեց պետական կարգավորման մեկ միասնական մարմնում (կառույցում) կենտրոնացնել արտադրությունից մինչև վերջնական սպառումը սննդի շղթայի բոլոր փուլերում բուսական և կենդանական ծագման սննդամթերքի անվտանգության առնչվող գործառույթները, ինչը բացառում է դրանց կրկնորդումը Հայաստանի Հանրապետության գյուղատնտեսության, առողջապահության և էկոնոմիկայի նախարարությունների կողմից:

Սննդամթերքի անվտանգության պետական ծառայությունն իր մեջ ներառում է սննդամթերքի անվտանգության և որակի վերահսկողության, անասնաբուժության, բուսասանիտարիայի 3 տեսչություններ, փորձարկման լաբորատորիաներ, ինչպես նաև սննդամթերքի անվտանգության ոլորտի ռիսկերի գնահատման և վերլուծության գիտական կենտրոն՝ պետական ոչ առևտրային կազմակերպության կարգավիճակով:

Ռիսկերի գնահատման գործընթացում առկա գիտական պոտենցիալի ներգրավմամբ նախատեսվում է ստեղծել գիտական խորհուրդ՝ պատշաճ գիտական վերլուծություններ իրականացնելու նպատակով:

36. Հայաստանի Հանրապետությունում սննդամթերքի անվտանգության օրենսդրությունն անհրաժեշտ է բարելավել և մոտարկել միջազգային չափանիշներին՝ սննդամթերքի անվտանգության առկա իրավիճակն ամբողջությամբ բարելավելու և սննդամթերքի ոլորտի արտահանման պոտենցիալը խթանելու նպատակով: Հայաստանի Հանրապետության սննդամթերքի և անասնակերի անվտանգության հորիզոնական և ուղղահայաց օրենսդրության մոտարկումը *բարելավելու է* ՍԲՍ ոլորտը՝ պայմանավորված սննդի շղթայի շարունակական վերահսկողության իրականացման համակարգով, սննդամթերքի լիարժեք վերահսկելիությամբ, սննդամթերքի անվտանգության ոլորտի ռեֆերենս լաբորատորիաների զարգացմամբ, HACCP սկզբունքների ներդրմամբ, սննդի շղթայի վերահսկողության համար պատասխանատու մասնագետների և հասարակական կազմակերպությունների շարունակական ուսուցման համակարգի կիրառմամբ, տեսուչների մեթոդաբանության ներդրմամբ, հանրային իրազեկման արշավներով:

37. Հայաստանի Հանրապետությունում ընթանում են սննդամթերքի անվտանգության ոլորտի տեխնիկական կանոնակարգերի մշակման և միջազգային չափորոշիչներին ներդաշնակեցման շարունակական բնույթ ունեցող բարեփոխումներ: Ներկայիս դրությամբ մշակվել և գործողության մեջ են դրված սննդամթերքի անվտանգությանն առնչող 15 տեխնիկական կանոնակարգեր ու ՀՀ կառավարության որոշումներ: ԵՄ 852/2004 և 853/2004 կանոնակարգերի հիման վրա մշակվել և ՀՀ կառավարության 2011 թվականի հունվարի 20-ի N 34-Ն և N 79-Ն որոշումներով ընդունվել են սննդամթերքի հիգիենային ներկայացվող պահանջների և ձկնորսության արտադրանքի հիգիենային ներկայացվող առանձնակի պահանջների տեխնիկական կանոնակարգերը: Հեռանկարային առաջընթացի պլաններում ակնկալվում է հավատարմագրված փորձարկման լաբորատորիաների ստեղծում՝ մնացորդային նյութերի և սննդամթերքի անվտանգության հետազոտությունների նպատակով, ինչպես նաև տեսչական համակարգի բարելավում:

Ընդհանուր առմամբ, մեծածավալ աշխատանքի անհրաժեշտություն է առաջացել ոլորտը կանոնակարգող ՀՍ-ների, ԳՕՍ-երի, սանիտարական կանոնների և հիգիենիկ նորմատիվների ուսումնասիրության և համապատասխան տեխնիկական կանոնակարգերի մշակման ու ընդունման ուղղությամբ, որպես ոլորտը կարգավորող և կատարման համար պարտադիր հիմնական փաստաթղթեր՝ դրանք աստիճանաբար մոտարկելով (ներդաշնակեցնելով) Եվրամիությունում գործող ստանդարտներին:

38. Անհրաժեշտ է հետագայում մոտարկում կատարել նաև Եվրամիության սննդի մասին իրավական դաշտին (178/2002 կանոնակարգ), հիգիենայի փաթեթի կանոնակարգերին՝ 852/2004, 853/2004, 854/2004, 882/2004, 2073/2005, ինչպես նաև ԵՄ ուղղահայաց օրենսդրությանը և այլն: Մոտարկման մակարդակները *հիմնված են լինելու* սույն Որոշման «Գործողությունների ծրագիր» հավելվածում ամրագրված բացերի շարունակական ուսումնասիրությունների վրա: Գործողությունների ծրագրով հորիզոնական օրենսդրության մոտարկումը նախատեսվում է 2012-2014 թվականներին, իսկ ուղղահայաց օրենսդրության մոտարկումը՝ 2013-2015 թվականներին:

39. Գյուղատնտեսական մթերքի (հումքի) արտադրանքի վերամշակման ոլորտներում, ժամանակակից գիտության և տեխնոլոգիաների զարգացմամբ պայմանավորված, գյուղատնտեսական նոր արտադրանքի արտադրության կազմակերպումը, պեստիցիդների, կենդանիների աճի խթանիչների, տարբեր տեսակի սննդային հավելումների կիրառումն

առաջացնում է սննդամթերքի անվտանգության վրա բացասական ազդեցություն ունեցող հավելյալ ռիսկեր: Սննդի շղթայի փուլերում առկա և հնարավոր ռիսկերի գնահատման ու վերլուծության համար կարևորվում է աջակցության ընդլայնումը գիտական ներուժի, ինստիտուցիոնալ կառույցների կարողությունների նպատակային օգտագործման և խրախուսման ուղղությամբ: Այս նպատակով ձևավորվել է «Սննդամթերքի անվտանգության ոլորտի ռիսկերի գնահատման և վերլուծության գիտական կենտրոն» ՊՈԱԿ-ը, որը մշակելու է կարողությունների ուժեղացմանն ուղղված հստակ միջոցառումների ժամանակացույց:

40. «Սպառողների իրավունքների պաշտպանության մասին» Հայաստանի Հանրապետության օրենքի ընդունմամբ սննդամթերքի անվտանգության բնագավառում սպառողների շահերը ներկայացնող և պաշտպանող հասարակական կազմակերպություններն իրենց գործունեությամբ զգալի աջակցություն են ցուցաբերում պետական կառավարման մարմիններին: Սակայն իրականացվող բարեփոխումների շրջանակներում պահանջվելու է, որպեսզի հասարակական կազմակերպությունները և սննդաարդյունաբերության ճյուղային ոլորտների միությունները, սննդամթերքի արտադրությամբ զբաղվող տնտեսավարող սուբյեկտները առավել ակտիվ ներգրավվեն սննդամթերքի անվտանգության բնագավառի նորմատիվ-իրավական դաշտի ձևավորման, սննդամթերքի անվտանգության ապահովման վերաբեյալ ուսուցողական միջոցառումների կազմակերպման և մոնիթորինգի գործընթացներին:

41. ՍԲՍ բնագավառում իրականացվելիք բարեփոխումների արդյունավետության և կառավարելիության մակարդակի բարձրացման նպատակով *ստեղծվելու է* սույն ռազմավարության իրականացման գործընթացը համակարգող խորհուրդ՝ Հայաստանի Հանրապետության վարչապետի նախագահությամբ և գյուղատնտեսության, առողջապահության, էկոնոմիկայի, արտակարգ իրավիճակների նախարարների ներգրավմամբ: Խորհրդի քարտուղարի պարտականությունները *վերապահվելու են* սննդամթերքի անվտանգության պետական ծառայության պետին:

42. Օրենսդրական և վարչարարական բարեփոխումների փուլում որոշում է կայացվելու հետագծելիության կարևորագույն սկզբունքի ապահովման նպատակով, այն է՝ արտադրողների ռեգիստրի և կենդանիների համարակալման համակարգի ստեղծում: Հաջորդ բարեփոխումը նախատեսվում է իրականացնել կենդանիների մեջ

անասնաբուժական դեղամիջոցների մնացորդների մշտադիտարկման ու վերահսկողության ոլորտում: Առաջընթացը թե՛ վերոնշյալ մակարդակներում, թե՛ սննդի համակարգի ամբողջական շղթայի անվտանգության ոլորտում հնարավորություն է *տալու* երկրի գյուղատնտեսությանը ունենալու անվտանգ և մաքուր սնունդ՝ այսպիսով շահույթ ունենալ առկա և հետագա Եվրամիության առևտրի ազատականացված գոտու պայմաններից:

43. ՄԲՍ ոլորտի և դրա օրենսդրական հիմքի բարելավմանն ուղղված նշանակալի քայլ է Հայաստանի Հանրապետության վարչապետի 2011 թվականի հուլիսի 26-ի N 711 որոշման համաձայն ՄԲՍ միջգերատեսչական աշխատանքային խմբի ստեղծումը (այսուհետ՝ աշխատանքային խումբ), որը պատասխանատու է Եվրամիության հիմնական սկզբունքների և պահանջներին՝ ազգային օրենսդրության մոտարկման համար: Նշված աշխատանքային խմբում *ընդգրկվել են* սննդամթերքի անվտանգության, անասնաբուժության և բուսասանիտարիայի փորձագետներ, իրավաբաններ: Նորացված կազմով ստեղծվելիք ՄԲՍ միջգերատեսչական աշխատանքային խմբի անդամները *ընդգրկվելու են* ուսուցողական, վերապատրաստման ծրագրերում համագործակցելով Հայաստանի Հանրապետությունում Եվրամիության խորհրդատվական խմբի ՄԲՍ բնագավառում միջազգային փորձագետների հետ, Հայաստանի Հանրապետության գործող օրենսդրությունը Եվրամիության օրենսդրությանն (Aqius Communautaire) աստիճանաբար մոտարկման, համապատասխան ծրագրերի մշակման և իր կանոնադրությամբ նախատեսված այլ գործառույթների իրականացման ուղղություններով: Ստեղծվող աշխատանքային խմբում *ընդգրկվող* մշտական գործող փորձագետների և գյուղատնտեսության ու ագրովերամշակման ոլորտի մոտարկումն իրականացնող մասնագետների համար *կազմակերպվելու են* ուսուցման (վերապատրաստման) դասընթացներ, *ստեղծվելու են* անհրաժեշտ պայմաններ իրենց վերապահված գործառույթների իրականացման համար: Ուսուցման առանցքային և առաջնահերթ խնդիրներից է Եվրամիության օրենսդրության գաղափարախոսության, մշակույթի, հայեցակարգային մոտեցումների իմացությունը, օրենսդրության մշակման հմտությունների, ունակությունների կատարելագործումը, հիմք ունենալով յուրաքանչյուր մոտարկվող օրենսդրական ակտի հնարավոր ազդեցության գնահատականը ձեռնարկատիրության վրա՝ (հատկապես փոքր և միջին ձեռնարկատիրության) արտադրություն-վերամշակում-իրացում շղթայում:

Աշխատանքային խմբի համապատասխան ուսուցում ստացած մասնագետներն այնուհետև *փոխանցելու են* իրենց գիտելիքները Հայաստանի Հանրապետության ՍԲՍ բնագավառում աշխատող այլ մասնագետներին:

44. ՍԲՍ բնագավառում իրականացվելիք բարեփոխումները նպատակաուղղվելու են նաև ինստիտուցիոնալ կառույցների արդիականացմանը և կարողությունների հզորացմանը, կադրերի ուսուցմանը և պատրաստմանը (մասնավորապես՝ Հայաստանի պետական ագրարային համալսարանի կրթական ծրագրերի շրջանակներում ՍԲՍ բնագավառը կարգավորող Եվրամիության օրենսդրության մասին իրագեկման դասընթացների ներառման միջոցով), տեսչական գործունեության բարելավմանը և արդյունավետության բարձրացմանը, մատուցվող լաբորատոր ծառայությունների կատարելագործմանը, արդիականացմանը, տվյալների բազայի (շտեմարանների) ստեղծմանն ու զարգացմանը, արագ արձագանքման համակարգերի ներդրմանը: *Մշակվելու են* ընթացիկ ուսուցման ծրագրեր, և դրանք *մատուցվելու են* գործողությունների ծրագրի տարբեր կետերը ներկայացնելուց հետո, գործողությունների ծրագրով սահմանված ժամկետներում՝ կայունություն ապահովելու նպատակով:

45. Առաջիկայում իրականացվելիք բարեփոխումներից կարևորվում է նաև HACCP-ՎԱՎԿԿՀ համակարգի ներդրման համար մեթոդական ձեռնարկների մշակման և հրատարակման, ինչպես նաև ուսուցողական դասընթացների կազմակերպման գործընթացը, որն իրականացվելու է ինչպես Հայաստանի Հանրապետության պետական բյուջեի, այնպես էլ միջազգային կազմակերպությունների և տնտեսավարող սուբյեկտների միջոցների հաշվին:

Հասարակական կազմակերպությունների հետ շարունակական համագործակցությունը օրենսդրությամբ պայմանավորված շրջանակներում խիստ էական գործոն է հանդիսանալու անվտանգ և մաքուր սննդի վերահսկողության համակարգերի ներդրման և կիրառման մեջ սննդի ամբողջ շղթայում:

46. Եվրամիության սննդամթերքի անվտանգության համակարգը բազմազան է ու բազմաբնույթ, այդուհանդերձ այն հիմնված է հետևյալ հիմնական, համընդհանուր սկզբունքների վրա՝

1) սպառողների առողջության համար սննդամթերքի հնարավոր վնասակար ազդեցությունից պաշտպանության նպատակով սննդի շղթան՝ արտադրությունից մինչև

սպառում, որպես մեկ միասնական ամբողջություն դիտարկելն է («Ֆերմայից մինչև պատառաքաղ», կամ «դաշտից մինչև սեղան» սկզբունքը)։

2) հետագծելիության սկզբունքը.

3) սննդամթերքի անվտանգության գիտականորեն հիմնավորված ռիսկերի գնահատման, խորհրդատվության տրամադրման, ռիսկերի կառավարման ընթացքում դրանց գիտականորեն հիմնավորված գնահատականների հիման վրա որոշումների կայացումը («ռիսկերի վերլուծության սկզբունքը»)։

4) սննդամթերքի անվտանգության համակարգի գործունեության վերաբերյալ հանրությանը հստակ, ամբողջական և հավաստի տեղեկատվության տրամադրումը («թափանցիկության և շահառուների ներգրավման սկզբունքը»)։

5) սննդամթերքի անվտանգության ապահովման համար սննդի շղթայի բոլոր փուլերում գործառնություններ իրականացնող տնտեսավարող սուբյեկտների՝ ներառյալ անասնակեր և առաջնային գյուղատնտեսական մթերք արտադրողները, վերամշակողները, իրացնողները, նկատմամբ օրենսդրությամբ սահմանված կարգով պատասխանատվության միջոցների կիրառումը («տնտեսավարող սուբյեկտների պատասխանատվության սկզբունքը»)։

6) սպառողների առողջությանը սպառնացող վտանգի հավանականության առկայության դեպքում, երբ վտանգի լիարժեք գնահատման համար գիտական հիմքերը բավարար չեն կամ անորոշ են, ռիսկերի կառավարման նախազգուշական միջոցների կիրառումը («նախազգուշացման սկզբունքը»)։

Ռազմավարությունը նպատակաուղղված է սննդամթերքի անվտանգությունն ապահովող համակարգի ստեղծմանը, որը խթան է հանդիսանալու Հայաստանի Հանրապետությունում սննդամթերքի անվտանգության բարելավման համար, և կստեղծի գյուղատնտեսական արտադրությունների, այն է՝ խոշոր եղջերավոր անասունների, ձկների, այգեգործական, մեղվաբուծական, խաղողագործական արտադրանքների և խմիչքների արտահանման ավելի մեծ հնարավորություններ։

Ռազմավարության իրականացման ընթացքում՝ մինչև 2012 թվականի վերջը, սննդամթերքի անվտանգության ինստիտուցիոնալ շրջանակը էապես բարելավվելու է՝ ներառելով իրավասու մարմինների հստակ լիազորություններ, Հայաստանի Հանրապետության վարչապետի վերահսկողությամբ սննդամթերքի անվտանգության



խորհուրդ, ՄԲՍ միջգերատեսչական աշխատանքային խումբ, խորհրդակցություն շահագրգիռ կողմերի միջև, ինչպես նաև կենդանական ծագում ունեցող սննդամթերքի և կերերի անվտանգության վերահսկման վերանայված կանոնակարգեր: ՄԲՍ ոլորտի հորիզոնական օրենսդրությանը և ուղղահայաց ենթաօրենսդրական ակտերի մոտարկումը Եվրոմիության ՄԲՍ ոլորտի օրենսդրությանը տեղի կունենա մինչև 2015թ: Մինչև 2013թ.-ի վերջը լաբորատոր և գիտահետազոտական հնարավորությունների բարելավման միջոցով սննդամթերքի և կերերի անվտանգությունն ու համապատասխանությունը կբարելավվի, կբարձանա տեղական և ներմուծված սննդամթերքի վերահսկողությունը: 2011թ-ից սկսած մինչև 2013թ-ը, հնարավորությունների քայլ առ քայլ կատարելագործմանը զուգահեռ, <<Սննդամթերքի անվտանգության ոլորտի ռիսկերի գնահատման և վերլուծության գիտական կենտրոն>> ՊՈԱԿ-ը կիրականացնի ռիսկերի գնահատում՝ հիմնված գիտահետազոտական փորձերի վրա: Կենդանիների և բույսերի առողջությունը կբարելավվի վերահսկողության ամենամյա ծրագրերի իրականացման և/կամ հիվանդությունների վերացման միջոցով՝ բարելավված վերահսկողության համակարգի աջակցությամբ: Կենդանիների համարակալման և պահպանման տարածքների գրանցման համակարգերը աստիճանաբար են ներկայացվելու՝ հաշվի առնելով գյուղացիական տնտեսությունների համար հնարավոր ֆինանսական հետևանքները և հանրային մարմիններին: Սննդի և կերերի շղթայի, սննդամթերքի մնացորդների ռիսկերի գնահատումը, ինչպես նաև HACCP-ի և հետազոտության սկզբունքների իրագործումը սննդի և կերերի ողջ շղթայում, իրականացվելու է մինչև 2014թ-ի վերջը: 2013թ-ից ներդրվող տվյալների բազայի հասանելիության և բարելավված կարգավորումների արդյունքում սահմանային հսկողությունը լինելու է ավելի արդյունավետ:

**V. ԵՎՐՈՊԱԿԱՆ ՄԻՈՒԹՅՈՒՆՈՒՄ ԵՎ ՆՐԱ ԱՆԴԱՄ-  
ՊԵՏՈՒԹՅՈՒՆՆԵՐՈՒՄ ՍՆՆԴԱՄԹԵՐՔԻ ԱՆՎՏԱՆԳՈՒԹՅԱՆ  
ԱՊԱՀՈՎՄԱՆ ՀԻՄՆԱԿԱՆ ՍԿԶԲՈՒՆՔՆԵՐԸ**

47. Սպառողների առողջության համար սննդամթերքի անվտանգության ապահովման տեսանկյունից կարևորվում է միջազգային համագործակցությունը և տեղեկատվության փոխանակումը, մասնավորապես՝ սննդամթերքի և կերերի անվտանգության արագ

արձագանքման համակարգի (RASFF) միջոցով, որին Հայաստանի Հանրապետությունը միացել է 2010 թվականին:

48. Սննդամթերքի արտադրության, անվտանգության, սանիտարական և բուսասանիտարական բնագավառները կարգավորող իրավական ակտերը (կանոնակարգերը, հրահանգները, որոշումները և այլն) կազմում են Եվրամիության օրենսդրության («Acquis Communautaire») բաղկացուցիչ մասը և պարունակում են շուրջ 300 հիմնարար իրավական ակտ: Ընդ որում Եվրամիության օրենսդրությունը շարունակաբար կատարելագործվում է, հետևաբար՝ ազգային օրենսդրությունը Եվրամիության չափանիշներին ներդաշնակեցնելու ուղղությամբ տարվող աշխատանքները կրելու են շարունակական բնույթ և իրականացվելու են Եվրամիության օրենսդրության փոփոխմանը զուգընթաց՝ հաշվի առնելով Հայաստանի Հանրապետության առանձնահատկությունները:

## VI. ՌԱԶՄԱՎԱՐՈՒԹՅԱՆ ՀԻՄՆԱԿԱՆ ՆՊԱՏԱԿԸ ԵՎ ԽՆԴԻՐՆԵՐԸ

49. Ռազմավարության հիմնական նպատակն է սննդային գործոնով պայմանավորված սպառողների հիվանդությունների առաջացման ռիսկերը հասցնել նվազագույնի՝ Հայաստանի Հանրապետությունում սննդամթերքի անվտանգության համակարգը Եվրամիության չափանիշներին աստիճանաբար ներդաշնակեցնելու միջոցով, ինչպես նաև ստեղծել անհրաժեշտ նախադրյալներ՝ անասնաբուժական, բուսասանիտարական, կենդանիների բարեկեցության ապահովման համար և խթանել տեղական արտադրության սննդամթերքի մրցունակությունը ներքին ու արտաքին շուկաներում:

50. Սննդամթերքի անվտանգության ապահովման ռազմավարության հիմնական խնդիրներն են՝

1) սննդամթերքի անվտանգության ապահովման ոլորտի գործող օրենսդրության կատարելագործումը, սննդամթերքի անվտանգության ապահովման ոլորտի տեխնիկական կանոնակարգերի մշակումը և վերամշակումը, ինչպես նաև ազգային ստանդարտների մշակումը և սահմանված կարգով ընդունումը՝ Եվրամիության չափանիշներին ներդաշնակ:

2) ինստիտուցիոնալ կառույցների կարողությունների հզորացումը կառավարման բոլոր մակարդակներում (ազգային, տարածքային, տեղական ինքնակառավարման մարմիններում, ինչպես նաև միկրոմակարդակում՝ տնտեսավարող սուբյեկտներում)։

3) Հայաստանի Հանրապետությունում արտադրված, ինչպես նաև ներմուծվող և արտահանվող սննդամթերքի որակի և անվտանգության նկատմամբ պետական վերահսկողություն իրականացնող կառույցների ամրապնդումը, գործունեության արդյունավետության բարձրացումը՝ հիմք ընդունելով ռիսկերի գնահատումը և վերլուծությունը.

4) հանրության, հասարակական կազմակերպությունների, ինչպես նաև տնտեսավարող սուբյեկտների կողմից որոշումների կայացման, իրազեկվածության, մոնիթորինգի բնագավառներում մասնակցության անհրաժեշտ մակարդակի ապահովումը՝ ելնելով միջազգային լավագույն փորձից.

5) սննդամթերքի արտաքին ապրանքաշրջանառության ներկայիս խիստ բացասական հաշվեկշռի աստիճանական բարելավումը, ագրոպարենային համակարգի միջազգայնացումը, համեմատական առավելությունների վրա հիմնված սննդամթերքի տեղական արտադրության մասնագիտացումը.

6) նպատակամետ քաղաքականության մշակման և իրականացման շնորհիվ ագրոպարենային համակարգում ներդրումային գրավչության բարձրացումը, տնտեսավարող սուբյեկտների պետական աջակցության ընդլայնումը, այդ ուղղությամբ պետություն-մասնավոր հատված-օտարերկրյա ներդրողներ համագործակցության ապահովումը, արտադրություն-վերամշակում-իրացում շղթայում.

7) Հայաստանի Հանրապետության ՄԲՍ բնագավառում ծառացած խնդիրների լուծման ուղղությամբ իրականացվող քաղաքականության գաղափարախոսության հիմքում ընկած են Եվրամիության օրենսդրության սննդամթերքի անվտանգության, անասնաբուժության, բուսասանիտարիայի ոլորտների պահանջները, ինչը կապահովի ՄԲՍ բնագավառում իրականացվող բարեփոխումների ամբողջականությունը, միասնականությունը և կհանդիսանա իրականացվող բարեփոխումների «ճանապարհային քարտեզը»:

## VII. ՌԱԶՄԱՎԱՐՈՒԹՅԱՆ ՀԻՄՆԱԿԱՆ ՈՒՂՂՈՒԹՅՈՒՆՆԵՐԸ

51. Ելնելով ռազմավարության հիմնական նպատակից և խնդիրներից, սննդամթերքի անվտանգության համակարգի զարգացման բնագավառում իրականացվող քաղաքականությունը *ունենալու է* հետևյալ հիմնական ուղղությունները՝

1) ազգային օրենսդրությունը Եվրամիության չափանիշներին ներդաշնակեցնելու (մոտարկելու) նպատակով Հայաստանի Հանրապետությունում գործող օրենսդրության արմատական վերանայում. իրավական ակտերում սահմանված կարգով փոփոխությունների և լրացումների կատարում, ինչպես նաև մի շարք նոր օրենքների և ենթաօրենսդրական ակտերի ընդունում՝ հիմնված սույն որոշման N 2 հավելվածով սահմանված առաջնայնությունների և ազդեցության գնահատականների վրա.

2) սննդամթերքի որակի ու անվտանգության վերահսկողության և կենդանիների բարեկեցության այլ ստանդարտների աստիճանական ներդրում, որի համար *պահանջվելու է* ներկայումս գործող մի շարք ազգային ստանդարտների վերանայում, ինչպես նաև միջազգայնորեն ընդունված որոշ նոր ստանդարտների, կանոնակարգերի մշակում, սահմանված կարգով ընդունում և կիրառության ընդլայնում.

3) ազգային մակարդակում գործող ինստիտուցիոնալ կառույցների գործունեության բարելավում, նորերի ստեղծում և զարգացում՝ Եվրամիության օրենսդրության չափանիշներին համապատասխան, *որի արդյունքում լուծվելու են* տարբեր պետական լիազոր մարմինների, տեսչական և պետական ոչ առևտրային կազմակերպությունների գործառույթների կրկնորդումը բացառող, *ինչպես նաև* լաբորատորիաների ցանցի ստեղծման, տեխնիկական վերազինման, միջազգային չափանիշներով հավատարմագրման, ռեֆերենս լաբորատորիայի կամ լաբորատորիաների ստեղծման *վերաբերյալ* հարցերը: *(Ինստիտուցիոնալ բարեփոխումների շրջանակներում առանձնահատուկ ուշադրություն է դարձվելու ստեղծվող ՍԲՍ միջգերատեսչական աշխատանքային խմբի անդամների ուսուցմանը, որակավորման բարձրացմանը, մասնավորապես՝ արտադրություն-վերամշակում-իրացում շղթայում ներգրավված ձեռնարկատիրության վրա Եվրամիության օրենսդրության պահանջների ներդրման ազդեցության գնահատման արդյունքները հիմք ընդունելու ունակության բնագավառում).*

4) ինստիտուցիոնալ կառույցների հզորացման առումով գիտակրթական ենթակառուցվածքի հետագա զարգացում գիտականորեն հիմնավորված ռիսկերի գնահատման, վերլուծության և որոշումների կայացման նպատակով, ինչը ներառում է ՍԲՍ բնագավառում գործունեություն իրականացնող կադրերի ուսուցումը, վերապատրաստումը, գիտական առաջավոր փորձի փոխանակումը և գիտնական-մասնագետների ու պաշտոնատար անձանց միջև արդյունավետ փոխհամագործակցությունը, գիտակրթական

հաստատություններում Եվրամիության օրենսդրության վերաբերյալ գիտելիքների տարածումը.

5) կառավարման տարբեր մակարդակներում գործունեության արդյունավետության բարձրացման ներկայիս բարեփոխումների համատեքստում շահագրգիռ նախարարությունների աշխատակազմերի քաղաքականություն մշակող և պետական վերահսկողություն իրականացնող ստորաբաժանումների իրավասությունների տարանջատում, ամրապնդում և համալրում բարձրակարգ մասնագետներով, ինչպես նաև քաղաքացիական ծառայողներ հանդիսացող մասնագետների օրենսդրությամբ սահմանված կարգով խրախուսում.

6) հետազոծելիության սկզբունքի գործնական և արդյունավետ կիրարկում, որի համար *իրականացվելու են* օրենսդրական, ինստիտուցիոնալ և տեսչական գործունեության անհրաժեշտ բարեփոխումներ: *Այդ ուղղությամբ պահանջվելու է եվրոպական լավագույն փորձի համախմբման միջոցով լուծում տալ տնտեսավարողների՝ հատկապես անասնապահությամբ զբաղվող ֆերմերների հաշվառման, տեղեկատվական տվյալների բազայի և շտեմարանների ստեղծման, խոշոր եղջերավոր կենդանիների, իսկ հետագայում նաև մանր եղջերավորների, ձիերի, խոզերի համարակալման, սպանդանոցների ցանցի ստեղծման և ընդլայնման, սննդամթերքի անվտանգության արագ արձագանքման համակարգի ներդրման և վերջինիս արդյունավետ գործարկման վերաբերյալ հարցերին ու մի շարք այլ խնդիրներին՝ ելնելով Եվրամիության երկրների լավագույն փորձից.*

7) Հայաստանի Հանրապետության օրենսդրությամբ սահմանված սննդամթերքի անվտանգության համար տնտեսավարող սուբյեկտների պատասխանատվության սկզբունքի հիման վրա, ՎԱՎԿԿՀ-HACCP համակարգի աստիճանական ներդրման ուղղությամբ անհրաժեշտ միջոցների ձեռնարկում՝ ըստ արտադրության ոլորտների՝ Եվրամիության սննդի անվտանգության սկզբունքներին համահունչ: (Նշված համակարգի ներդրման համար *պահանջվելու է դոնոր-հանրության ֆինանսական, տեխնիկական և խորհրդատվական աջակցությունը*).

8) ռիսկերի գնահատման հիման վրա ստուգումների անցկացման, օպերատիվ (վթարային) արձագանքման, ռիսկերի գիտականորեն հիմնավորման և այլ ընթացակարգերի, ինչպես նաև ուղեցույցերի, նորմերի ու կանոնների մշակում և կիրարկում,

որի համար պահանջվելու է համապատասխան ֆինանսավորում և գիտնական մասնագետների ներգրավում.

9) պեյություն-մասնավոր հատված համագործակցության ընդլայնման, դոնոր-հանրության կողմից տրամադրված ֆինանսական միջոցների արդարացի ու արդյունավետ բաշխման ուղղությամբ համապատասխան միջոցների ձեռնարկում, հնարավորինս նվազագույնի հասցնելով տնտեսավարող սուբյեկտների, հատկապես փոքր և միջին ձեռնարկատիրության, մրցունակության վրա բացասական ներգործությունը՝ արտադրություն-վերամշակում-իրացում շղթայում, հաշվի առնելով Եվրամիության չափանիշներին սննդամթերքի անվտանգության համակարգը ներդաշնակեցնելու գործընթացի աշխատատեղերում, ժամանակատարությունը և ծախսատարությունը.

10) Եվրամիության Թվինինգ, Թայքս, BTSF Սիգմա, ինչպես նաև Հայաստանին հասանելի այլ գործիքների շնորհիվ սննդամթերքի անվտանգության ազգային համակարգի զարգացման հնարավորությունների ընդլայնում.

11) անասնաբուժական և կենդանիների կարանտին միջոցառումների իրականացման, կենդանիների պահպանման, տեղափոխման և սպանդի ընթացքում սննդածին հիվանդությունների ախտորոշման, տարածման կանխարգելման (կանխման), ինչպես նաև սանիտարական և անասնաբուժական միջոցառումների կիրառման նկատմամբ հետևողական մոնիթինգ: (Այս նպատակով պահանջվելու է Կենդանիների առողջության միջազգային կազմակերպության շրջանակներում միջպետական համագործակցության ընդլայնում և այդ ուղղությամբ արագ արձագանքման համակարգի միջոցով փոխադարձ կապի ապահովում).

12) կենդանական և բուսական ծագման մթերքի, բույսերի, բուսական արտադրանքի և կարգավորող առարկաների ներմուծման, արտահանման և վերաարտահանման նկատմամբ պետական վերահսկողության ուժեղացում՝ սահմանի անցումային կետերում, որի համար այդ կառույցները տեխնիկապես վերազինվելու են՝ սննդամթերքի անվտանգության, անասնաբուժության և բուսասանիտարիայի օրենսդրության մոնիթինգում համահունչ.

13) կենդանական ծագման մթերքի, կերերի, կերային և սննդային հավելումների, պրեմիքսների, բույսերի, բուսական արտադրանքի, բույսերի պաշտպանության միջոցների, պարարտանյութերի, անասնաբուժական դեղամիջոցների շրջանառության ամբողջական շղթայի կանոնակարգում.

14) սննդամթերքի անվտանգության, անասնաբուժության, ինչպես նաև բուսասանիտարիայի ոլորտներում ռիսկերի գնահատման վրա հիմնված ստուգումների անցկացման մեթոդական ուղեցույցների մշակում և ներդրում.

15) սննդամթերքի անվտանգության բնագավառում գործառույթներ իրականացնող միջազգային մարմինները (կառույցները) կապող «առցանց ռեժիմով» ցանցի մոդելով համապատասխան ցանցի ներդրում (RASFF).

16) անասնաբուժական դեղամիջոցների և էկոլոգիական աղտոտիչների մնացորդային քանակությունների մոնիթորինգային ծրագրերի մշակում և իրականացում.

17) սննդամթերքի շուկայում սննդամթերքի անվտանգության ապահովման նպատակով վտանգավոր սննդամթերքը, ինչպես նաև վտանգավոր սննդամթերքը շուկայից հետ կանչելու, ոչնչացնելու, օգտահանելու հստակ մեխանիզմների սահմանում.

18) օրգանական գյուղատնտեսության, ինչպես նաև սննդարդյունաբերության ճյուղի մրցունակության բարձրացմանը աջակցում՝ նկատի ունենալով ներքին և արտաքին շուկաներում հայրենական արտադրանքի նկատմամբ սպառողների վստահության ձեռքբերումը:

## VIII. ՌԱԶՄԱՎԱՐՈՒԹՅԱՆ ԻՐԱԿԱՆԱՑՄԱՆ ՄԵԽԱՆԻԶՄՆԵՐԸ, ԱԿՆԿԱԼՎՈՂ ԱՐԴՅՈՒՆՔՆԵՐԸ ԵՎ ՄՈՆԻԹՈՐԻՆԳԸ

52. Ռազմավարությամբ ամրագրված հիմնական ուղղություններով քաղաքականությունը գործնականում *իրականացվելու է* վերջինիս կատարումն ապահովող գործողությունների ծրագրով, որում հստակ *նշվելու են* միջոցառումների կատարման ժամկետները, պատասխանատու կատարողները, ֆինանսական գնահատականը և ակնկալվող արդյունքները:

53. ՄԲՍ միջգերատեսչական աշխատանքային խմբի կողմից *մշակվելու են* Եվրամիության օրենսդրությանը մոտարկվող (ներդաշնակեցվող) իրավական ակտերի ցանկը և դրանց մշակման ժամանակացույցը, որը *համաձայնեցվելու է* Եվրամիության պատասխանատուների հետ:

54. Ռազմավարության իրականացման մեխանիզմներից է նաև համապատասխան ինստիտուցիոնալ կառույցների ամրապնդումը կառավարման բոլոր մակարդակներում և դրանց իրավասությունների և պարտավորությունների հստակ սահմանումը: Այս

համատեքստում առանձնահատուկ կարևորվում է Հայաստանի Հանրապետության էկոնոմիկայի նախարարության դերը, որն իրականացնում է պետական կառավարման մարմինների գործունեության համակարգումը՝ Եվրամիության Արևելյան գործընկերության շրջանակներում Ասոցացման համաձայնագրի, ինչպես նաև վերջինիս բաղադրիչը հանդիսացող Եվրամիություն-Հայաստան խոր և համապարփակ ազատ առևտրի համաձայնագրի ստորագրման նախապատրաստական աշխատանքների ուղղությամբ:

55. Ռազմավարության իրականացմամբ *ապահովվելու է* Հայաստանի Հանրապետությունում Եվրամիության չափորոշիչներին ներդաշնակեցված սննդամթերքի անվտանգության համակարգի ներդրումը, ինչը նվազագույնի կհասցնի սննդային գործոնով պայմանավորված առողջության վրա ազդեցության ռիսկերը՝ անկախ սննդամթերքի միանգամյա կամ շարունակական օգտագործումից:

56. Սննդամթերքի անվտանգության կենսունակ համակարգի ներդրմամբ նախադրյալներ *են ստեղծվելու* պարենային հումքի և վերամշակված արտադրատեսակների արտաքին առևտրաշրջանառության ներկայիս խիստ բացասական հաշվեկշռի բարելավման ուղղությամբ:

57. Եվրամիության սննդամթերքի և անասնակերի անվտանգության հորիզոնական և ուղղահայաց օրենսդրությանը Հայաստանի Հանրապետության սննդամթերքի անվտանգության օրենսդրության մոտարկումը սննդի շղթայի մշտական վերահսկման մեխանիզմների կիրառման, HACCP համակարգի ներդրման, մշտադիտարկմամբ զբաղվող տեղական մասնագետների համար ուսուցման համակարգի ներդրման, տեսուչների համար մեթոդական ուղեցույցների մշակման, հանրային իրազեկման արշավների միջոցով *բարելավվելու է* ոլորտի գործունեությունը: Մանրամասն մշակվելու են ընթացիկ ուսուցման ծրագրերը, որոնք մատուցվելու են գործողությունների ծրագրի տարբեր կետերը ներկայացվելուց հետո, գործողությունների ծրագրով սահմանված ժամկետներում՝ կայունություն ապահովելու նպատակով:

58. Ակնկալվում է, որ սույն ռազմավարության ընդունումը *նպաստելու է* դոնոր-հանրության կողմից իրականացվող աջակցության արդյունավետության և հասցեականության բարձրացմանը, ինչպես նաև իրականացվող դրամաշնորհային ծրագրերի համակարգմանը, մասնավորապես՝ Եվրամիության կողմից Արևելյան գործընկերության քաղաքականության շրջանակներում Հայաստանի Հանրապետությանը հասանելի



գործիքների արդյունավետ և նպատակային կիրառմամբ: Այդ նպատակով առաջիկայում նախատեսվում է միջազգային դոնոր-կազմակերպությունների կոնֆերանսի անցկացումը՝ հավելյալ ֆինանսական միջոցների ներգրավման նպատակով, ելնելով յուրաքանչյուր դոնոր կազմակերպության առաքելությունից (մանդատից):

59. Հաշվի առնելով, որ սննդամթերքի անվտանգության ապահովման բնագավառը միջգերատեսչական բնույթ ունի, ուստի սույն ռազմավարության իրագործման մեջ ներգրավված պետական կառավարման մարմինները, ոլորտային նպատակային ծրագրերի, նորմատիվ իրավական ակտերի կամ ծրագրային այլ փաստաթղթերի մշակման գործընթացում *ներառելու են* սույն ռազմավարության դրույթներից բխող միջոցառումները:

60. Ռազմավարության իրականացման մոնիթորինգը *իրականացվելու է* ինչպես պետական կառավարման շահագրգիռ մարմինների, այնպես էլ հանրության, դոնոր-կազմակերպությունների և մասնավոր հատվածի ներուժի ներգրավմամբ: Մոնիթորինգի արդյունքներով Եվրամիությանը և բոլոր շահագրգիռ դոնոր կազմակերպություններին *ներկայացվելու են* սույն ռազմավարության կատարումն ապահովող գործողությունների ծրագրի միջոցառումների իրականացման վերաբերյալ եռամսյակային հաշվետվություններ: